

四庫全書

集部

欽定四庫全書

嵩山集卷二十四

宋晁公遡撰

啟

答宇文提幹啟

茲辱升堂更承進牘究觀家世實兼文學政事之科審
察色辭宜在身言書判之選惟法所在夫誰敢私某官
世祿相傳典刑未遠欲得公侯必復其始嘗思富貴所

致之途儻令聲績之發揚何有宦游之濡滯士相見皆有贊已特貺於華牋力有餘則學文更佇觀於行事

答劉提幹啟

七里之郭久矣汗顏六轡如絲忽焉在手豈有不待臨軒而遣其使於外初亦未嘗詣闕而有以知其人方懷芒刺之憂敢當竿牘之賀某官蚤與同道頃嘗定交聞我錫命之云初恨其辭滿而將去退而自解去復何傷子有酒酌言醻之苟得須臾而共樂朝聞道夕死可矣

豈必追逐以相從某過辱推尊愈深慚悚高才宜在於
要近安得使之三年淹故事尚須於講論或肯為此數
旬客庶幾連城之不二價遂作奏章之第一人既擅舉
賢之名又獲告善之助提封傳誦袞朽光榮

答趙提幹啟

來見伯氏獲觀賓筵無間父母之言誠為令子不挾兄
弟而友敢辱長牋紬繹之深兢慙良甚某官蚤以強學
出而決科蓋共歎於宗英顧尚淹於外服問職事之所

領似是馬曹念本支之不同皆如麟趾佇膺夾輔勉務激昂姑少致於鄙悰實莫酬於厚意

答利路楊提幹啟

絳

頃者授命乃在九月十月之交忽焉踰時所有三年二年而舍常恐不明於審克豈期遠辱於褒稱某官少而多能輔以博習為己之學而為人之學蓋兼達於古今在家必聞而在邦必聞實有聲於郡國久淹小宰之選交上諸公之章即當橫飛遂致光顯某亦預外屬嘗聞

內言嫂使治棲乃是徐吾犯之妹義之與比敢忘晏平仲之交儻存至情更冀忠告

答朱總幹啟 瑰

遠煩遣使持辱貽書何須今日而告言非敢後也止若衆人之稱頌不欲觀之亟誦華牋敢忘厚意某官讀書學古射策起家自當與俊傑以爭先顧乃見衰遲而增歎能勝其任而不勝其任方議論相半之間其可以言而未可以言豈高明有待於後儻加愛與願惠箴規

答令狐江津啟記

受命往圖於撫宇秋以為期得書知困於劇煩日不暇
給今規模之已定必宴處之居多某官官以最遷職因
才選適當頽敝之極無懼剽裁之難聞菴議而族談謂
前貪而後耄尊俎可越昨幾使戶祝而代之琴瑟不調
今惟有更張可鼓也勉務為邦之善力求矯枉之方有
德者以寬願思其次請益曰無倦孰易斯言既以謝罕
牘之勤是亦塞朋友之責

答劍門何知縣啟

劍門天下之壯蓋謂此邦鼎鼻山中之賢今為之牢尚懷宿昔之好遠貽勞苦之書某官見重西州嘗仕東部頃同僚敗事而不可逭欲下吏議罰而有所分誠加之罪其無辭乃以相及使惡其害而去籍則不可知君非避而逋逃我何從而迫蹙逮其置對果以辨明益見處己之公何辱飛牋之謝佇期善政遂應最條由是觀羞惡之心亦以間讒惡之口

答宇文知縣啟

乘逸興於椽曹未遑出仕歸時事於旅宰乃欲請行各屬攸司豈容專達某官資以果藝生于膏梁嘗蒙當途之知將試宇民之政蓋可寄百里之命信所優為而況貢九牧之金殆其細事君其請於外計我敢忘於前言

答石照李知縣啟

為君子儒屢臨百里與鄉人處今有二天必將推挽以成名何待衰遲之致力某官宜在高位久沈下僚慨然

有望於交游謂我蓋怜於淹滯雖名譽不聞者朋友之罪屬當今日而敢辭然左右未可而大夫曰賢難使諸公之必聽命也有在子其少須

答文瀘川啟淵

比居官曹實在封部不能察舉以論其最則異於衆人於是辟召而用其才莫如我同姓特勤枉駕更示長牋某官常思揚名頗欲治劇捨墳墓而遠去受書幣而亟行千里而來何以利吾家使有聞於斯世千室之邑可

使為之宰惟不負於所知非徒父老之舉安抑亦宗族而相賀

答師中江啟琛

聽孤獨老幼之辭方念當按於庶獄有夫妻子母之屬相與辱在於懿親乃自比於衆人亦過形於嘉頌某官既學而仕將大其門早讀聖賢之書必明出處之際可以仕則仕而可以止則止宜無累於行藏甚易知莫知而甚易行莫行豈但專於誦說子雖斬於直諒而相益

我敢忘夫親愛而不言所望聰明勉思忠告

答李通江啟

惟子居官以待都鄙之治非吾屬部且在邦域之中忽
貺以書重增其媿某官先猷是似雅好不忘三家子弟
往來復相從於今日一門叔父阿大顧尚記於當年要
各懋於遠圖庶不隸於素業末由會晤良切瞻懷

答何宣教啟

有道之主方求士之甚勤觀國之光宜上章而自薦諒

應其黨咸壯此行某官喜逢休明恥在貧賤獻書于府
久擢賢能之科爭名於朝今往輦轂之下必膺茂選可
謂良圖鄰里想助其貴裝則具一日之積廟堂當為之
歎息不遠千里而來寢向嚴凝所祈保攝

答石泉軍呂教授啟

商隱

對策龍墀之下獲望清光題名鴈塔而歸誠為盛事敢
忘厚意特辱迂臨某官儒家者流大夫之後雖未果一
言而悟主今方以六藝而為官顧平日讀春秋之經皆

天子行賞罰之事無煩下問其可從政也歟但於是書更當盡心耳矣功名不遠談笑可期

答雒縣楊主簿啟 景溫

選郡國博習之士比分試於禮闈策天人大槩于廷茲遂登於高第得賢之喜非我敢私某官少而讀書足以待問况慕通儒篤實之學兼好故家深湛之思豈但著見于言今當發施於事息乎已學而勤乎未學宜求為政之方以其無私而能成其私更勵在公之志吾子於

所知不忝老夫亦他日有榮

答龍安范縣尉啟

子庚

頃以諸侯薦人天子躬上賢能之書今者大夫母諱有司直陳帝王之道游從交賀衰朽與榮某官早讀父書力循祖武當夙興而夜寐思幼學而壯行古所謂之賤曹茲乃為之官守溫故而可為師矣更熟究於聖言作易者其知益乎正宜施於行事姑因裁報畧致切磋

答張監稅啟

伏承歸見鄉黨朋友得遂田園之間免與商旅庶人日
算舟車之利遙想居家之樂少償在職之勞某官追記
向來頗為甚恨正歲以法警戒顧憲令之具存征商自
賤丈夫况古今之共嫉乃安於官府之敝壞致容其胥
徒之詆欺何須屑屑而有言如謂馬不進姑置區區於
既往當若魚相忘遠煩染翰之貽莫識占詞之報

答李監稅啟元雍

頃參諸公之幕府始識執事之庭闈今安敢忘昔者吾

友嘗於斯矣退復自念人之愛子亦如予乎故為汲引
於當途何辱感銘而進牘某官才堪筮仕志慕決科尚
滯少常伯之選中每見尊大君於坐上蓋聞相語顧小
子未其有若汝封莫省何時使國人皆曰賢然後用第
恐老夫不足為重然在高才寧當久淹佇觀自爾而奮
飛更冀往哉而勉勵

答王端復宣教啟

如聞喜告其徒遭先生於道更煩趨進以禮就主人之

階仍出長牋敢忘厚意某官決科筮仕舉族為榮惜其
不往一對于廷今乃未獲三釜之祿能念所自謂我獻
賢能書于王無久此留須子視朝夕食之節益勉務於
德業期顯揚於君親

答趙將仕等啟

西伯善養盡收耆老以來歸東方未明喜著朝衣而顛
倒貽牋為謝撫已何堪某官少而讀書老益篤學勿恨
蒞官之已晚要觀行道之何如視里中兒雖蚤登於牕

仕扣囊底智試自効於聖時使其有聞顧彼奚羨因輒陳
於忠告用少報於高文

答劉粹中詩啟

敢辱乃翁相顧之厚見其二子焉因知其家甚藝而文
作者七人矣披詩書而載誦歎詞采之不凡某人出則
趨庭入則問寢蓋嘗聞於學禮豈止盡於事親共高鄉
黨之評實為庠序之秀元方難為兄而季方難為弟皆
可謂之才良賢人言如地而聖人言如天更勉觀於遠

大行射主司之策益顯親闈之榮率爾占辭聊以為報

謝王甲獻詩啟

時紆麗藻見貺大篇一言蔽之蓋溢於美三友益者顧
豈所宜始開卷以覽觀良撫躬而悵悒某人博以學問
富於文辭頗知東坡議論之遺欲慕北征制作之大誠
能屬句何君子多乎哉若乃近諛非王公尊者也過飾
老朽併增感慚

謝投獻啟

每承過客之臨訪皆如執事之褒稱謂其權可以察舉
於人將求所欲也觀其牋莫不洋洋於美無乃為佞乎
雖非敢當其可不報某人能事長上尤工辭華有力以
學文蓋居於今而無泥於古惡訏以為直喜論其是而
莫稱其非顧惟蠢愚常用慨歎聽其言而觀其行難遽
信於鋪陳為於家而賞於朝顧更思於踐履

答蘇解元賀年啟

竭來為郡坐見發春何用賀為不知老之至爾所期歲

美樂與賢者共之某人生於聖時逢此穀旦既醉以酒
福自及於周家言采其芹永方消於泮水第慙老守難
稱華牋農人告以暮春行矣當勤於勸穡壯者修其暇
日勉哉相率以化民

嵩山集卷二十四

欽定四庫全書

嵩山集卷二十五

宋晁公遡撰

啟

賀葉左相啟

惟帝則哲知當代非常之才謂公其來正上相久虛之位識者相賀翕然同辭竊以無烈火則不能見精金之良非嚴霜則何以表勁柏之節故君臣之間因事而益

信凡聖賢之德遇謗而乃彰睿懷有感於中深恨大用
之晚某官言合稷契名高蕭曹頃在天官之銓仕不賊
吏及居道揆之地忠以事君國之倚毗衆所屬望比奉
身而遽去俄當寧之有言昔惑於詆欺惟予一人失罰
今聖彼讒說灼見三有俊心自茲委任而不疑必將功
業之有立某遙想都邑歡騰詠歌國人皆曰賢其何傷
於日月太師以為首以其告於神明竊見遠方實同慶

頌

賀魏右相啟

置諸左右作相爰選邇僚踰於前後數公莫如舊德始正台衡之位亟新海宇之觀竊以載籍之傳以至于今未有政事之堂而無其長殆將踰歲曾莫告廷忽一朝典冊之遂頒必千載明良之相得某官自任以重能尊所聞出遇可為之時見知有道之主舜受堯之天下每躬稟於聖謨尹相湯于鳴條方共圖於武事參決國論時游機庭屬宰席之久虛顧朝紳之相語衆但知居衡

軸之地惟帝其難之上以謂預巖廊之游非君誰可者既執魁柄即成顯庸某猥被隆施淳膺煩使有所譽其有所試恐稱塞之不能可與立未可與權但恪勤之是勉敢期晚歲永託大鈞

答眉州秀才啟

猥叨殊恩獲守是土讀詩書律令蓋天下至於吏民視動作語言皆能習知於守令况我俊造秀於里閭某人學由家傳經有師法如土地豐美而宜杞梓之產須雨

露長養以成棟樑之材豈意餘生獲觀諸彥增置博士弟子既已興太平之原召問長老先生正欲聞安集之道過承華翰雖感至情顧稱譽之良多非衰遲之所望其為愧怍未易敷陳

答師解元啟

昔卧東牀偶與其選今來西蜀乃守此邦方思往事以感傷過辱親朋之慰藉某人早游於藝更博以文當求攀桂之高枝但用穿楊之舊箭勉趨遠大何羨衰遲延

賞不識於韋臯高門固無其事衛玠可齊於樂廣老夫安有是名念莫謝於貽書顧徒為之起愧

答王解元啟

久處里間阻隔仙桂之籍特勤屐屨來由瑞草之橋念西華之子其甚貧誦東坡之詩而永歎某人年稱耆舊學有淵源尚餘棕鞋桐帽之風乃因蓬戶桑樞之陋席間相見宛如紅帶之老人江上爭扶誰弔青衣之遺迹因追思於往事實有感於予懷勉答長牋莫酬至意

答蘇解元啟

將臨劇郡初無兩漢之循良忽辱高文已有三蘇之風
氣不勝其愧莫稱此邦某人生于士鄉輔以世業固知
辭彩之本其俗更宜朴厚以率其人不恥下問是以謂
文乃過求於衰拙何必讀書然後為學盍少變於浮華
庶還近古之風皆云自子而始愚或有得謀敢不忠

答史解元啟

行路棘澁悵踰月而莫前丈人冰清撫舊游而不見方

為興感忽辱飛文某人能敬先賢不忘雅好儻自知於肺腑肯但作於面朋周親不如仁人願深明於鄙意文質然後君子豈專事於空言跋涉方疲報酬甚畧

答呂解元啟

每自念為郡縣之長刑人殺人豈若論養性命之方上藥中藥可以濟衆不專利身喜承巾屨之臨願聞水火之濟某人蚤以秀士游于膠庠雖不能登賢能之書顧今稱有典刑之老彼列諸侯千八百國顧反病民而誦

醫經數十萬言蓋嘗起死居官何有較德良慙某適會
簿書之間要觀色脉之妙知仲景之名世雖識鑒不及
於前賢問思邈以養生庶壽考或延於晚歲因修牋牘
之報輒陳悃愞之言

答令狐解元啟

嘗記往年斯友一鄉之善豈期今日不遠千里而來載
誦高文信為良友某人秉德溫厚通經精深長而多鬚
尚肖乃祖之狀微雖具體肯作小人之儒頃屬老夫之

為邦乃偕邑子而見客但謂同師於洙泗不知異派於
淄澠陳亢問於伯魚使吾兒之與處仲尼失之子羽顧
我輩以何言今觀徒步之相從益歎久要之未有佇看
決科之選當獲知言之名

又答

紛如五鼓初去故都違之一邦復得劇郡正望樂告以
善乃貽溢美之言某人學問精深行能茂美肯如餘子
嫋嫋而為丈夫蓋慕古人彬彬然後君子某頃從宴語

每歎高風要盡此生相與為盛德事共矯其敝不必解
世俗書繼自崇朝願聞讜論

答楊秀才啟

至三老之州已喜觀於多士望一區之宅尚越在於他
邦方切詠懷遽承勞苦某人文能行遠志欲決科將求
郡刺史而引嫌遂就部使者之勸駕四海皆兄弟况老
夫誠與之有交三歲興賢能在高才何患於不得勉從
鄉舉佇慶彙征

答宋解元啟

尚記去年見於稠人廣坐未知戚屬出於大夫貳宗載辱迂臨愈增厚媿某人深懷至性篤念懿親肯恕老夫之廢忘復與天倫而趨進人不知而不愠能思先聖之立言聲相應而相求蓋謂外家之同氣銘藏此意感歎于中

答史解元啟

一鄉友善士顧每見而欣然十年為故人况相從之舊

矣重承牋牘益歎情文某人屬詞甚工誨人不倦自行
束脩以上嘗辱教於吾兒以樂嘉賓之心復燕游於茲
地良為喜快未易名言

答白解元啟

周之治尚文蓋亦極矣漢之斲為朴冀以返之豈伊居
塾而為師尚有貽書之過實某人聚徒講藝樂道安時
無心富貴而富貴逼人茲固言其有命匪求童蒙而童
蒙求我惟勿倦於教人使郡縣獄訟之遂衰而閭里絃

歌之相接孝弟犯上者鮮安敢忘吾子之功仁義非禮不成亦當修太守之職各期弗懈庶俾有傳

答梁敦義秀才啟

竊承負笈而來鼓篋於此要與人才而輩出過於古磬十六枚益思賢哲之善言觀諸聖門二三子况是文翁之興學勿止張叔而為師列於左右之生當異於衆從彼先後之進更審所宜因辱賦詠之貽輒効切磋之報

答宋秀才啟

送以禮樂而有光華是稱膚使聞諸道路未知信否敢
辱長牋良佩眷存更增感怍某人實在外屬有懷至情
粲然鋪陳言不可若是其幾也觀其稱頌謂吾何足以
堪之亟為占辭莫殫謝悃

答楊昌辰謝依竹堂詩啟

家多竹而門可欵每嗟瞻晤之無由言為詩而聲成文
姑託詠歌而相語反勤遠駕特謁賓筵某人優游田廬
嘯傲林壑如姑蘇山中之客築少陵野外之堂汗簡而

鴻殺青夜然膏而不倦班衣以奉垂白冬生筍而可飧
若自結於歲寒不復追於時好忽輒其寢門之間而從
我朋簪之游何可一日無此君能為賢者之事不遠千
里利吾國豈肯徒然而來勿遽迓於庭闈請劇談於仁
義

答彭州李倅啟

二月初吉遠辱貽書三歎遺音深為擊節何鋪張之甚
麗乃退託於不能某官蒞官之初休駕未久雖雅志欲

安於其位願為小相焉顧諸公皆念於是邦未甚此時
者聞簿書之緣絕致期會之稽遲巧匠旁觀而縮手袖
間忍視斯民之彫敝謁者復通而望履幕下往見其屬
之走趨責其在公率以稱最少副當途之意益為知已
之榮

答眉州樊倅啟

人之良會當知有數其間今者遠來頗恨相見之晚屬
己去郡莫遑為僚某官嘗仕是邦久知其俗必念辭滿

之後不勝彌療之餘顧若衰遲斗筲之人何足算也宜
加恩惠山徑之蹊介然成之勿令此道之不行庶使斯
民而有賴願敦實効無事空言

嵩山集卷二十五

欽定四庫全書

嵩山集卷二十六

宋晁公遡撰

啟

賀馬總領啟

典司外計盡按四道之圖進預內朝兼行六卿之事途
歌相愛家給可須竊以為郡者常患於不知縣之盈虛
理財者常患於不知民之緩急民力已竭而斂之愈甚

縣道已困而督之益嚴上徒舉於空名下將受於實害使有司披籍而可以盡取雖云掊克以何傷計常年數貢而曾不少增蓋是蠲除之未及能去此弊有待於公某官性資寬平德業遠大執經以講博洽為明主之知持橐可觀沈深有輔臣之量忽從邇列出殿大邦以為置於言語侍從之間不若試以勞來安集之政近者聖慮惻然有懷若伊陟臣扈巫咸必能奉使而稱意及庸蜀微盧彭濮遂令薄賦以輕徭察羣臣無以易堯顧遠

人安敢輕漢初傳閩部悉謂得賢某屬以短才領茲郡
郡一歲三十倍於古方撫事以驚嗟八家九百畝之田
庶自今而休息其為厚幸實異常倫

答王丹稜啟

與

感今懷昔嘗預慈恩之題名積行累功暫屈武城之為
宰雖欣集處良歎滯淹某官業精於經才出其類頃擢
居於上第蓋見譽於諸儒但推所學於官自然有聲於
世周大夫所舉既高賢能賓興之書蘇都官有言亦如

刑賞忠厚之論某正望賢哲以佐迂疎春秋長於治人
豈難裁割君子文以會友更願講論

答何彰明啟

居實

揭來是邦每歎多士觀其游宦豈止乘朱輪者十人粲
然貽書幾至排牙籤之萬軸茲勤臨賁更切歎稱某官
蚤以學優居嘗治最承初辭於劇邑恨晚見於高標孟
子遠來利吾家願聞言論相如未至居客右益誦風流
屬為郡之少閑愧占辭之甚畧

答孫主簿啟 唐英

就客位而趨未遑往弔見凶服者式況辱降臨仍出詞
氣於不勝哭踊之餘重增迂拙以莫克負荷之愧某官
斬然在疚善於居喪節哀順變念其始之必無致於毀
性立身揚名孝之終也當務在於顯親見加華袞之文
如誦素冠之作既深銜感因為興悲

答侯知錄啟

三日彈琴不成聲甫終喪制五國為屬而有長過見推

尊己荷臨門更期墜翰某官嘗事大府無慙士鄉成都
出入之錢蓋多於河南庫通義傳授之學不下於膠東
生乃能兼擅是名必將有聞於世勿深追遠之感勉務
立身之榮姑陳鄙言少答來覲

謝李解元投詩啟

黯然而別將去善士之鄉富哉其言特辱仁人之贈披
尋踰晷感愧益懷某人才則患多談何容易心醉六經
而目營四海實記覽之無遺朝為百賦而暮作千詩殆

從容而可辨歷考前輩離筵之詠孰如吾子今日之文
篇幾及於周詩辭不出於鄭志有以多為貴者觀璀璨
而甚驚必使反而和之顧衰惄而難強勉為占謝以報
勤拳

謝郭解元投詩啟

送乎淇之上如欲追攀殷其山之陽忽為驚歎乃承歌
詠有動聽聞某人善事公卿猥及衰朽有志於學蓋異
巴三峽之人各賦以詩足見鄭七子之志既深稱賞併

切感藏

答宋教授啟

自至是邦以來每求故家之後流風有存者如平生之所聞曷月旋歸哉顧相見之何晚伏惟某官奮自庠序列於搢紳結綬登王畿願供當世之用下帷為博士歸作諸生之師忽然在乎賓客之筵欲修事其大夫之禮特貽華翰莫亮鄙懷但知禱于上下神祇賜以樂歲非求譽於鄉黨朋友託之空言益用感慚曷勤敷寫

回王解元啟

竭來効官近方稅駕叩門甚急喜見玉川之長鬚發亟熟觀如獲天祿之奇字過情之譽何德以堪某人才冠士林行高鄉黨念久聞於謳牘但未見於昂霄顧愚鄙夫猶君等伍本類虞卿之躡屩辱在泥塗偶先劉琨而著鞭弛於負擔何從者之不察執禮意以甚恭循省踰時虛辱盛貺遠詢永氏之子將問奚從不知木偶之人自忘所届高明過聽慙負無窮何以報之念欲傾囷而

並進無可言者姑令垂橐以空歸感愧之情敷染難盡

答杜帳幹啟

行臺官屬之賢則從其長闔部租賦所出皆聚此書喜
耆宿之肯來想勾稽之無隱某官老故自任見聞實多
雖如轅固壽考之高乃有衛武康強之福步趨猶健尚
能對前殿而據鞍考覈必明豈復容諸侯之去籍計匪
遙於瞻悟宜可畧於報酬其為欣愉未易言寫

答石泉呂教授啟

馬繫階下今其寧居雞籠城中豈所宜處顧致宏大者
其發常晚將享富貴者其初必窮勿撫事而不怡但修
身而少待某官出而干祿近於居夷意甚傷王中正之
開邊恨不及魏師魯之為守子雖僻陋亦神祇祖考安
樂之彼有貲盈則柱後惠文彈治耳姑勤乃職以教諸
生

答叙州杜倅啟

太宰之職比為官而擇才別駕之功將指日而報政遙

想封部已皆詠歌某官秉心剛方臨事強敏昨雖以尊
嗜相傾而遽去亦足見正直不屈之可觀勿云即叙之
邦而乃鄙夷其地昔是漢夜郎之故國今有黃太史之
遺風雖天下仕者欲立於朝豈久煩於在外而君子居
之何陋之有宜亟使於移風某遠辱華牋且知厚意愧
編摩之罔既致感謝之不周

答何合州啟

始登公堂丞列中庭而拜近去大水人得平土而居計

勞來之甚勤想懼呼而相慶某官治行之美聖朝所知
已嘗佐糾繩之司更欲觀安集之政昨當昏墊之際皆
恨按臨之遲幾如漢武之時殆可沈於玉璧早得王尊
之至必不近於金隄某因考載籍之占敢為左右之賀
水所及則地美害既去則利興江流泛濫之餘泥為數
斗秋成收穫之厚畝益三升豈特邦人含哺而嘻亦遂
使君為郡之樂

答楊提幹啟

茲承就位首辱修牋戚戚焉於心方懷臨事之懼洋洋乎盈耳甚非虛己之求某官早以英才玩於大易多識必知於往行寡辭宜慕於吉人生之來日有所聞乃其望者文之敝當救以質相與矯之幸怜衰老之何堪日佇箴規而無隱

答王塾江啟

比淹小宰之銓不知而不慍今遇當途之士有德者有言交上薦賢之章何勞進牘之謝某官蚤膺推擇屢試

劇煩或十年或七八年同輩亦多於改秩方百里方五十里居官獨久於守民迨茲考課之聞竊恨奏論之晚衰遲何力感愧良深

謝李志脩投書啟

茲承往駕特辱貽書若曰父義和謂其乃益友之族猶大夫崔子顧予亦流俗之人深愧衰遲難當稱譽某官早知儒學蓋出世家如有意於切磋故相從而咨訪天下之事不必問汝曰安安則為之賢者之道初何難我

欲仁仁斯至矣舉以為報往哉踐言



嵩山集卷二十六

欽定四庫全書

集部

嵩山集卷

二十七至三十

詳校官起居注主事臣顧宗泰

主事臣呂雲棟覆勘

總校官進士臣繆琪

校對官中書臣王家賓

謄錄監生臣李敦源

欽定四庫全書

嵩山集卷三十七

宋晁公遡撰

樂語

管領楊叅政

朝廷大臣既乘駟馬安車而去位郡縣長吏當奉養牛上尊以至門是固國家之舊儀亦表里間之盛事恭惟某官仕宦而遇明主富貴而歸故鄉名遂功成蓋聞君

子之大道年高德邵實兼天下之達尊雖在燕閒所宜
優禮知郡敬以折俎陳於宰庭鯀祝在後而餚祝在前
敢忘本朝體息之意廩人繼粟而庖人繼肉庶幾諸侯
奉事之恭通判摠衣以趨正襟而立饋醬於太學須進
禮而示尊侍坐於先生願奉觴而為壽某等創逢高會
逖考前聞笑蘇欒城顛沛而不歸喜孫文懿安榮之復
見輒興善頌以抒下情

口號

遠屋扶疎草木高曉張翠幕拂青霄初陳樽俎歌子夜
便覺園林如午橋慣見黃封曾賜醴少留赤鳥未還朝
歌呼肯伴長安吏誰道尊嚴絕百僚

管領虞叅政

大臣所至郡守備橐鞬而出迎尊客之筵主人陳鐘鼓
而作樂是為典禮著在冊書眷言當道之小邦敢廢前
賢之故事恭惟某官才可任重謀能折衝暨避臯陶而
避熊羆豈特朝臣之皆服不畏呂姥而畏常虎至今敵

國之猶傳絕口不言奉身而去今天或者往慰先公於九原於帝念哉行賜少府之一節復還近輔遂究成功知郡嘗懼辱知每思守道非不欲早託鑪錘之地蓋恐有私附權勢之嫌請觀羣情向背之間正在今日進退之際念昔處中而當軸世相慕而子來及茲居捐以避盈衆所棄而我取敬涓燕豆願致袞衣通判執爵伏興沒階趨進有酒多且肯幸陪燕衍之歡東帶可與言許接從容之語某等生居通義之壤近接仁壽之郊始見

安車載歸故里魯邑之在東表皆云同氣之相求楚冠而操南音想聽升歌而益喜

口號

忽聞赤鳥去承明不待當朝制作成今歲暫還安石墅
何人能撫野王箏玉屏山遶真佳麗金鼎羹調已太平
只恐須公斷國論召歸即日對延英

管領范運使

持節而行重部賢哉不居成功問途而指故鄉浩然乃

有歸志誠欲暫休高陽之里第恐已遣追鋒之車少留
燕嘉以勞行役恭惟某官名滿於蜀治最於夔郡縣向
風知有漢使者之來而可畏父老聚語蓋自王大夫之
去而未聞豈容言旋當益進用佇應懋賞環三百里賜
越之封然後就閒享十八年居頰之樂知郡嘗蒙奏牘
深願挽舟尊俎雖陳莫將幣帛箱篚之意土地所出可
無資糧靡屢之供通判尚友古人喜見君子達觀其所
舉歎鑒裁之甚明主歌無庸歸幸笑談而盡醉某等屬

陳薄伎獲對初筵設雲母之屏未遂瞻於公坐歌風人
之什茲敢獻於歡謠

口號

已見峨眉翠作堆巴人猶望傳車回驚聞江水連宵漲
知帶恩波不遠來池上蓮開白羽扇尊前荷卷碧筩杯
使君正欲為公壽莫遣津頭疊鼓催

管領程安撫

式干木之間里巷於是觀德置穆生之醴飲食所以尊

賢况我耆舊之英屢膺屏翰之寄家庭燕處族黨推高
是宜設席以肆筵相與作樂而侑食恭惟某官久勞于
外暫佚於鄉周旋郡國而譽益隆出入阡陌而人自服
眷此名城之重地蓋多前輩之間人豈惟其田十耦而
千尤近於古皆謂吾州三老之一復見於今因觀同時
執友之不傳愈覺大門風流之獨盛知郡嘗事巡屬每
懷依歸適來奉法而典城親見承師而問道論其宿望
天子猶當割牲在於諸侯庖人敢不繼肉通判亦思擁

篤當共舉觴同心之言臭如蘭每咨謀而允協君子之
交淡若水將歡好於窮年欣然合辭請以卜晝某等爰
自舞雩之歲乃居好學之邦日恭敬往朝未嘗見其貴
客之重夜掃洒張具孰有如此賓筵之華願効雅歌庶
資歡笑

口號

刺史開筵已合歡門前風動魯衣冠元王置酒邦人喜
公子虛車道路看况始垂紳休靜館亦曾持鉞上蒼壇

請觀禮樂詩書帥不比諸生氣象寒

管領郭提刑

二年按刑未有繚繼之中非其罪一日去位自謂田園
將蕪胡不歸惟此高風見於今日乃超然而命駕宜觀
者之塞途某官不喜浩煩每思清淨樂其有麋鹿魚鼈
姑往所居之谿卜之非疆虎熊羆少俟有為之會知郡
頃同臘仕久接劇談聖人之言遠如天嘗論瞿聃之道
君子之交淡若水不減管鮑之情屬言迄於故鄉實稱

嗟於清節因陳尊俎少駐車輿通判竦然相與言歎其
莫能及可止則止遂解綬而就閒惟賢知賢故舉觴而
為壽某等竊語於衆孰能如公中世士大夫罷官無所
歸顧當塗之皆是進食客主人興辭然後坐迨終日之
甚懽自慶難逢永歌以進

口號

今年遂解節旄歸憇復趨朝執介圭不向龍蟠落天闕
却尋牛飲指雲溪鳬鷺久別猶相識雞犬歡迎自不迷

坐使諸公歎高節千秋名滿劖東西

管領程達州

當年三老蓋相繼之多賢出守一麾今復還於故里考
彼耆舊未之前聞老史之在郊墟終身隱約而不得仕
大蘇之游臺閣皓首悵望而莫克歸是宜郡縣以為榮
遂設鐘鼓而相樂某官智畧開濟才能敏強退而居鄉
則為大家之賢長者出而分土必作致君之顯諸侯想
行致於超遷歎久安於閒散知郡每懷雅好况預英游

謂茲鄉人長於伯兄當先酌酒雖無幣帛將其厚意敢
廢吹笙敬卜良辰難辭徑醉通判更深永歎佇慶特招
雖甚喜惠然而肯來獲同談宴恐無由繼此而得見亟
上要津某等蚤生樂郊喜見高會明珠之照雙璧不減
前輩之風新炊而舉十觴願盡主人之意輒陳累句聊
助清歡

口號

熊軾傳聞昨去州邦人遮道不能留歸尋巷陌三老宅

卷二十六
永配聲名五相樓可惜久居巴峽遠不來相伴習池游
三春桃李今開盡綠葉成陰水自流

管領程卽州

解秩而歸其田園懷銀黃以夸鄉里守土者乃其賓客
出幕府而持旌麾於茲地以相逢舉近年而未有某官
出典四郡有聲一時為宗族鄉黨所稱無若此衣冠之
後得山川土田之錫蓋多其簪履之餘知郡擁彗以迎
奉觴而起官屬頌美爰自昔者以來門人為臣敢忘事

之以禮通判賓贊在坐感歎有言君之史趙堯今當牧
養於是客則敬陳紀願助旅酬於前某等獲奉初達喜
觀盛事欲資宴樂輒効詠歌

口號

今見門生奉六條里中父老盡歌謠竇嬰作意時修具
王吉從今日往朝子致肯甘供俎豆人尊封植戒芻蕘
白須紅帶身長健名位俱高瑞草橋

管領交代范知郡

迎新送故前事不忘後事之師設席肆筵邦君以為兩
君之好工師在列父老填鄴某官服民以寬為政以德
若河潤之所及皆日用而不知三年有勇而知方殆將
自化百姓感頌而相告安可少留通判三最著聞一郡
矜式食云食而敢不飽已加禮於當時樂莫樂於新相
知復交懽於今日知郡舉觴相慶傾蓋難逢血指而執
斧斤願師巧匠作樂而知笙磬喜得同音某等觀謠俗
之所傳歎燕嘉之未有暫停度曲永歎成詩

口號

淑景初升宿霧收朝來城郭盡歌謳一錢相送追劉寵
五鼓纔聞挽鄧侯鳳詔會從天闕下隼旟肯為野人留
給扶漢殿前朝事即見安車覲冕旒

管領通判

司馬令尹之偏實紀綱之所在執事天下之選復賢哲
之難逢况美景之良辰兼清時之勝事并此四者萃于
一時某官尤高吏能屢上治最今明天子在上方延訪

於智謀以誠長者處官宜入陪於議論尚乘泥軾姑惠
遠民知郡深服英才實為嘉歎仕宦絕在咸後何州縣
之久淹刑罰不如洪平顧弟兄之莫及茲設豆籩之禮
以資盃酒之懽某等執籥在行夏金罷奏不度斐然之
作願為瞽者之歌

口號

四郊草木亦欣欣賓主相懽昔未聞治道會令齊一變
邦人今喜魯中分晴江綠漲樓前水細麥黃堆隴上雲

樂歲益應風俗美里閭始見起斯文

鹿鳴宴

考德行道藝而興賢者雖曰舊章有飲食琴瑟以燕嘉賓是為高會共言茲部無及我邦永佑陵再有賓興首冠四海文忠公尤為畏避放出一頭閭里相傳風流未遠某人早知強學果預獻書議論得東坡之餘人物宜南宮之最浩然方策數千百載之洽聞屹然岷山三十六峯之擢秀行登上第式勸後生知郡擊節嗟稱舉觴

勞勉論士秀者深嗟有司之明以禮賓之爰設初筵之秩通判嘗臨試士所願成名業患不能精更當勤於講習酒行可以起無自溺於宴安某等喜刺史別駕之尊儒觀長老先生之在坐請誦食苹之雅以榮折桂之行

口號

吾州人物盛當時放出聲名壓九圍不日會看金榜掛何人先奪錦標歸得陪對策瞻龍袞何止橫經在虎闈再向南宮為第一他時相繼到黃扉

代人作管領鮮于都運

松舟檜楫咸榮衣錦之歸酒淮肉坻爰舉奏金之樂所
以厚豆籩之薦庶幾留徒御之行恭惟都運少尹當世
巨儒斯民先覺忠孝之節冠冕於百行文章之美鼓吹
乎六經決天府之浩穰人所謠頌主計臺之漕輓國以
富強朝廷已知其經濟之能天子閔勞以煩劇之政實
將登於大用暫均佚於殊庭行見雍容廟堂左右帝室
緩帶而率天下諒有待於世臣折筆而答闕中顧無勤

於聖慮此蓋知郡大夫分符千里託庇二天每接勝流
獲預登門之客嘗膺清舉深懷推轂之恩適逢輶傳之
來敢後餼牽之禮竊恐獸人之味不給於鮮願歌鹿鳴
之詩式燕以樂某等幸忝歌工之列獲觀食侑之華歡
頌發中敢陳口號

口號

玉節來為父老留使君開宴接英游朝雲卷旆離巫峽
秋水揚舲向蜀州翰墨宜居鸞掖貴君王行賜鶴書求

今宵明月須重賞不減當時庾亮樓

嵩山集卷二十七

欽定四庫全書

嵩山集卷二十八

宋 昆公遡 撰

文

謁先聖文

益部之人尚儒而好學自文翁始通義於時其猶郊遂
也被其教化今為最多夫尚儒而好學則其民知禮宜
其易治而或以為難者蓋不以吾聖人之道待其下則

其下亦不以聖人之道待其上矣某今得為刺史祇見于庭而今而後不以吾聖人之道待其下者有如江

謁諸廟文

某聞刺史至之三日皆見於廟刺史惟曰吾率故事既見則忘矣神亦惟曰彼率故事於吾何知所謂刺史者殆不識民保於神其欲撫有斯民者必致敬於神而後民獲所保焉某茲來非曰故事而已神乎鑒之

祭竈文

太守始至祀事必親相承蓋久莫識其因我則知之聞
諸古人與媚於奧不如事神惟神鑒觀祐我下民家有
炊火野有廩囷來者勿疑聽我誼誼

祭雨師文

敢昭告于雨師之神惟神茂育百嘉允茲膏澤載惟利
物敢急吉蠲謹以制幣牲齊粢盛庶品明薦于神尚享
祭雷師文

惟神出地起蟄功施奮豫羣萌必達美利無疆

祭社稷文

古者諸侯有罪則變置社稷有水旱則變置天子蓋屬
以其土地而其責同某今為刺史猶古之諸侯敬以三
日見於社稷某不敢陷於罪戾神亦惟救民水旱之災
其咎無愧

祈晴文

古之循良時無謬戾蓋由政事之善能致陰陽之和惟
我蠢愚為茲牧守豈期上天不弔越自暮春以來幾若

秋霖蛾欲化麥復行冬令蠶不齧桑吏如墜於淵水下
將無以衣食顧常雨常寒之罰宜加於刺史之身念斯
人斯疾之災無絕此下民之命我則不德彼其何辜即
是日以禱祈冀致誠之感格

謝晴文

比以淫雨告于昊穹大悲閣仁祠
諸廟有神天工人其代之不能
修政而底豐美巧言顏之厚矣乃復飾辭以致禱祈遂
開沈陰特出果日惟天佑于一德蓋其愛聖主而及斯

民有罪無以萬方豈忍因守臣而累茲土敢忘庇覩更

盡齋明願終惠於提封使獲逢於善歲

大悲閣云敗忘
正覺申勅羣靈

更期無歲之慈
降賜大熟之歲

祈雨文

因天事天因地事地國家嘗為百穀之祈曰雨而雨曰
陽而陽郡縣庶無三時之害吏之不德累於此方非霖
潦之為災則旱暵之告病乞晴之禱方遂干澤之請復
聞政乃弗修瀆亦太甚宜降刺史以罪疾罔害斯人之

粢盛十日雨而五日風幸今歲美一年耕而三年食得
逭民飢

天慶觀謝雨文

土為王土下臣屬當撫封民乃天民上帝自應敷佑茲
遂蒙於潤澤乃大起於焦枯顧非蠢愚能致感格自今
以始歲其有無復後災播種而耰時又同悉令大熟

又

惟此支郡属于守臣不能使四時之協和歲每告旱今

將及二年而代去民無阻飢蓋當旱乾必賜潤澤道大天大地大敢忘保佑之恩歲終月終旬終得免曠瘳之罪敬頓首以致謝因矢心而陳詞更祈眷懷以畢收斂

又

膏澤之下解此亢陽沐浴而朝謝于上帝肯徇微臣之請有憫老農之勞立苗正疏穫稻尚遠願時施潤於南畝庶幾終惠於西成

大悲閣謝雨

比聞吁嗟皆苦旱暵南交命羲叔莫修其官西方有聖人
蓋可以告施以膏澤曾不崇朝更祈無礙之慈卒副
有秋之望

又

某謬為郡國之長實賴天人之師昨者始來免憂凶年
救死而恐不贍及其將去復使服田力穡亦克有秋蓋
蒙慈悲每救旱暵豈宿世而曾親近故有禱必皆聽從
果終其二年常獲善歲願以此一念永歸大乘

大悲閣

為此聖人氓憫焉望歲念彼觀音力旱不作災惟匪遠
於斂收願遂終於保惠三十倍於古嘗憂征調之乏興
七八月之間更冀雨暘之順序

諸廟謝雨文

吏為政善雨則時若民罔告病神亦弗勞某來守此邦
蓋亦屬耳已干陰陽之和靡通山澤之氣致走羣望以
請于神惟神愛民勞則不憚而吏實失職愧其可辭某

聞昔帝堯十日則雨神於其時豈止一方而已也寧於聖代而獨不然神乎聽之尚享

又

神食此邦載在祀典有秩於國蓋與吏均近者亢陽惕然震懼施以潤澤非神不能請自今茲與神為謀民有疾苦吏不能去神則我責水旱之災而神不恤其如國何西成近止願以終惠無為國憂則天子亦將嘉神之休

又

某聞古之良吏所居之方氣不隔并時則大熟某之來
忽焉踰年病于夏畦無歲無之莫知所圖惟神是禱神
不我厭每禱必從然則守民者非某也神也神則有功
於國有德於民而某顧食此土可謂於民則有愧於國
則有負惟神矜其不能而察其將去以終惠之尚享

第五尊者祈雨文

惟我應真既授佛記隨其住處而作福田想謂有三近

古之風異於他方國土故得第五尊者之至為此大事
因緣若時相傳每禱必應乃當孟夏之月屬苦亢陽之
災願乞錫端之泉霑為封內之雨

又謝雨文

自諸佛威音王乃衆生慈悲父有羅漢之為上首所當
奉行在震旦而通他心亦復如是比苦亢陽之厄輒修
甘雨之祈普潤公田敢忘神力更冀從今以去隨念現
前大推赴感之慈應病與藥庶令多稼卒獲豐年

慈濟廟請湫水文

惟神所宅滙而為泉其蒸出雲而上于天膏澤溢流施于土田無有槁乾俾有豐年得命于朝廟食豆籩豈其降登有不潔蠲乃夏之始致此旱然請挹而歸潤及無邊敬自今茲孰敢不虔

又送水文

比以旱故請于山川乞水而歸以救槁乾甘澤隨之若建瓴然顧敢夕留敬迓諸淵惟夏蘊隆陰陽或愆無事

禱求即蒸于山保我稼穡固有後艱

慈姥巖請湫水文

尊者於此方蓋將示正法藏衆生以是水則能大作福
田頃得挈瓶而歸遂救闔境之旱惟火宅之焰方熾故
水種之苗易乾冀終惠於豐年敢復求於餘潤

祭文

楊叅政

惟公之鄉世蓋有人仕則光顯文則成名其文為誰文

安先生聲其仁義偕二子鳴其仕伊何曰孫文懿垂紳
于朝中立不倚致其為臣歸老閭里專以德化與鄉人
齒降及中微逮公復興文則子山煜煜其英公則貴矣
與壽作朋子山既亡瘞于九原謂公壽考曾不百年遂
令此邦氣象就萎鬱彼喬木忽焉變衰我昔守邦屢登
公門聞公嘗傾聲吐復吞遣隸以往于義弗敦我今過
之敬奠一樽

祭吳宣撫文

聖人之興獲祐昊穹爰出異才為帝折衝有韓有張萬
夫之雄在帝左右秉鉞以從帝曰有事汝往即戎執訊
而還曰帝之功維西岷山厥土巴庸外有勁敵誕肆不
恭帝曰其遠誰撫予封惟王之家父教之忠與其元兄
外攘內崇帝語于朝實惟臣宗乃俾專征賜之彤弓越
四十年為蜀帡幪敵來莫知野嬉而農爵既王矣秩則
三公宜錫壽考拜于臨雍遂濟大河訖歸鎬鄴斯志未
諳奄及考終士涕于途帝哭于宮尚其神靈駕彼豐隆

震驚要荒巍為雷風挾帝之輶自南徂東大復境土以
配車攻王今長往冥漠之中聞我矢詞其聽則聰

程邛州

古之諸侯有仕其國死則喪之是曰臣僕迨漢猶然嘗
與為吏其殞祚階則就哭位風俗之衰莫識故常生兮
相親歿兮相忘抑又甚者觀勢重輕三命已踰至名其
人矧復云士殆誰肯顧由客不賢或議其主我官涪陵
乃為公知薦我于朝遂致登茲廣柳之車忽自臨邛載

公以歸嗟弗克從雖弗克從敢廢古義使乎其行代我
往祭尚享

宋提刑

我始識公渝水之陽其氣甚溫如朝于庠語人响响惟
恐其傷可鎮彼浮可攝彼狂比再見之輶車煌煌巡屬
臨我有嚴令章霍然大驚孰知其剛厥德日新豈守故
常我友經仲乃薛之良曰仲山甫公之鴈行曾不一施
歸于山岡賢者先殞公今則亡嗚呼公家宜熾而昌汔

其衰矣天乎莫量哭以奠之儻其在傍

安制幹

在昔吾宗內外蟬嫣其盛莫如元祐之年迨今既衰外屬亦然念始東都見君弟昆乃翁於時給事黃門君蓋盛壯有乘華軒吾伯從父亦掌帝制人謂兩家中儕而起噫其如權弇忽斯已粵四十年復與君逢不圖其存各訴閨凶無寧常屯以待昊穹吾族伯止官既通貴君兄持節仍出奉使我喜而呼又舉而墜意君繼之晨夕

此留俄報其疾遽棘弗瘳失聲驚嗟涕泗以流有酒于
觴有饌于盤尚疑平生相對笑謹君乎過此為我一餐

嵩山集卷二十八

欽定四庫全書

嵩山集卷二十九

宋 昆公遡 撰

柬

上宰相小柬

即日璇穹週迴協氣充塞恭惟坐於廟堂兼運樞極王
室倚賴神明並相鈞候動止萬福某敬奉牋代其身賀
於堂上

二

通日不省鈞用何如聖賢相逢坐建中和之極當此淑
節更覺協氣周流伏惟冲粹集於神衿起居超勝其在
方內拳拳之情更乞盡消息理永享三壽之祉

三

某伏聞丞相之印明天子久未有所付海內延頸日佇
顯冊之頒蓋踰年于此矣屬者恭審詔自中出告於大
庭卿大夫則相賀於朝士庶人則相賀於家乃知明天

子必待其知之深而後用之富公韓公之登庸直如是耳某在遠不得從百事詣光範門敢致一牋於袞衣之前伏乞鈞覽

四

某名跡冗微不敢以書通於名公大臣而獨喜見東南來者從之間名公大臣之賢東南來者皆亹亹談相公頃在天官時吏不敢為姦而士大夫恃為津梁已有廟堂之望矣今某與遠方之人自聞召還揆路遂執鈞衡

無不欣欣相告中外幸甚幸甚

五

某少經憂患異於他人重以才具迂疎不任當世驅使
以此實無宦情顧出仕垂三十年無田廬可歸為貧所
驅矻矻州縣間但知自治而已不自意猥蒙朝廷遽從
支郡擢付一道而已蜀之俗喜為朋比以濶畧不事事
為賢某效之則違其本性且負朝廷欲不效之雖民則
喜矣其如官吏不悅者衆朝夕皇皇不知所圖輒敢布

之伏乞釣察

上執政小柬

即日春服既成恭惟端委廟堂樞密云端
委宥府四方承式神明並相鈞候動止萬福某敬奉一函於黃閣之下

二

此日不省釣用何如大君子與天地同流體備四時起居無不宜之也更乞持精養神永為王室柱石

三

伏惟名振天下德冠列辟聖上所欲亟用而中外猶恨
於晚某見方冊或有此而不謂今乃親覩也甚盛甚盛
自今傾耳以聽必有以大副四海之望

四

比聞強敵窺邊征戍之夫無不惶惶而彼終不復侵尺
寸之地卒於定議和好無間中國非閣下居衡軸之室
樞密云在樞機之庭何以使其無所疑而悅從哉某與斯人安於
奠枕幸甚幸甚

五

今士大夫皆身至宰庭乃得賜虎符而遣之郡某獨媿
安坐獲二千石印章既免往返萬里之途而即享飽煖
之賜銘藏恩紀無地寄言

六

某為貧逐食乃不自量得此難治之地百弊如絲棼殆
不可理蓋有年矣顧惟供億大軍不可乏興已於今月
初六日領賤事當竭綿力有以塞責不敢上煩汰遣伏

乞釣察

虞參政

某陸沈於峽內久矣昨者最蒙異常之知蓋不以流俗
相待常懼不足副此意及閣下立於九德之朝先賜以
手命某慙悸即修報而適遇使節出疆持書者空歸拳
拳之誠不能自達殆是賦分窮薄故姓名不克近貴人
之門爾後欲再以牋上公府顧相望如雲泥然又不敢
遣某今已至治所故事當謝於執政大臣敢併以布下

情併乞鈞察

王樞密

某陸沈於峽內久矣昨者最蒙異常之知屢奏其狀某每懼不足副此期待今得守通義號為通經習法之邦恐非短淺所能辦治然不敢不勉以無負疇昔併乞鈞察

楊參政

即日氣迫槐序恭惟勲在王室神明所相鈞候動止萬

福某敬奉一牋告至於行馬之前

二

比來不省鈞用何如伏以寅亮天地之才佚於第家則
移其施於國者而施諸身固宜陰陽和於中而協氣洽
於四體也豈待區區更獻尊生之請

三

通義之為州今劍東西皆莫敢與爭重蓋屬有廟堂之
老尊居里中車過者下而舉蜀之士大夫瞻望為矜式

吾州實甚盛也但恐赤鳥不可久留耳

四

迺者率爾貢牋於黃閣之前蓋百僚事大臣之禮也但得侍史通之已大幸敢謂勞謙特賜答教公則為盛德矣其如損朝廷之體何

五

今日已入境念將至治所即當步入里門請見於堂下顧惟謂大臣合齋戒沐浴卜日而後乞呼召許則進敢

先以墨啟布之下執事伏望察其不即入謁之意惶恐
惶恐

吳宣撫

即日惠風和暢恭惟卧護全蜀隱如長城神明並相鈞
候動止萬福某謹奉墨啟申問節下

二

邇日不審鈞用何如蜀地六十餘郡仰恃威德安於里
間於食必祝於社必禱伏惟者艾之福自應日增月加

更乞盡消息理下副巡屬拳拳之情

三

自建炎以來其以身為社稷之衛使西南一方之民老死不見兵革者計功孰出節下之右強敵畏威聞已請和今之元勲盛烈實在一門蓋當如伊呂開國傳之子孫與宋無極

四

某自入益部所在見里閭晏眠安樂之音相聞初不知

昨來敵之窺邊也道途之間皆云恃節下而然無不歎
息感戴其在郡縣之吏夫復何事惟當餽餉以時上寬
後釁之憂而已伏乞鈞察

五

某得郡於巡屬當詣節下受約束而後行竊惟月有成
歲有會不可少廢於須臾以負課殿上煩吏議謹以便
道取程今日已至治所其如不即奔走大府退切惶恐
敢望寬貸其慢以責其後効幸甚幸甚

六

某本不習吏道為貧逐食推移至於為郡雖全家遂得飽暖而夙夜是懼將不勝任而去所恃寬明責其可為而恕其所不能為某敢不自効

吳宣撫郡王

即日秋高氣肅恭惟裂地稱王威望益尊敵國畏服神明並相鈞候動止萬福某謹遣一介代覲

二

邇日不省釣用何如伏惟保安全蜀社稷倚賴功塞天地自應四時之氣集為太和洽於體府固當起居安強精力克壯不待區區以尊生為請

三

東至陝門西抵長道六十餘郡之人仰事俯育安於田里終身不聞風塵之警不蹈鋒鏑之患者郡王可謂有大造於茲土也上帝錫以難老天子極其寵祿尚未足報爾顧某安能形容萬分甚盛甚盛

四

伏以本朝以來元功大臣疏爵而王之者蓋皆可考未有若今勲業萃於一門坐扞秦雍之衝垂四十年使敵人憚服不敢窺邊論勲較德宜有茅土開國稱派茲審有司擇日備禮策命中外欣欣咸賀主上之行賞當功也其與巡屬之吏執筆修慶其敢後耶干冒鈞聽不勝惶恐

五

敢問一節以趨見於闕庭衝犯風埃跋涉山川鈞用不致勞乎伏想晝日三接天子改容出入三觀都人聳觀微豐功駿烈何以得此比來弭節漢中幢蓋旌麾光昭城府可以少休徒御某恨不得拜於轅門但勤引領

六

流落夔部今將老矣隨牒推移遂至為郡某三月六日已視賤事即具墨啟告於節下伏值介圭入觀不獲徵於侍史今敢併以致於大纛之前伏乞鈞察

虞參政

即日風扇微和恭惟赤鳥還鄉神相次舍釣候動止萬福某敬遣一介以代橐鞬之迎

二

邇日不省釣用何似四時之氣莫如春和伏想泛舟而來當此淑節山川華潤草木鮮榮亦足怡神而寓目更乞以道養壽永究霖雨之澤

三

伏以柱石之具豈可一日而去廟堂四方之人如芘大
廈忽聞釋位而去浩然自得天佑王室寧有使衰衣之
遂歸乎殆先太傅之丘墓思得台星之光一照映之耳
某敢言之

四

某平日受知最深比年以來幾若自絕於門牆情非敢
然顧揣分量才正宜爾耳去年三月六日至郡即為一
牋謝於黃閣自後無事不敢輒通名於侍史引領兩曜

之蹕但有馳爽不省釣慈亦亮其悃愞否併乞釣察

五

某伏聞齋航已入夔門久矣今江水清平風日妍暖正宜錦纓徐韋卧看江山雍容而歸某所領郡去玉屏山不遠敢問鹿轔亦由敝邑以往否惟朝夕俟櫂音肅拜以近不勝跂踵以待

趙總領

即日陽節清淑恭惟位冠九棘神相忠勞台候動止萬

福某敬奉一牋賀於節下

二

邇日不省台用何如伏惟君子所居溫厚之氣熏為至
和在於起居自應休暢更乞步趨實下以盡頤生之書
不勝至禱

三

節下按蜀圖籍內以撫民外以給軍論其功利益為天
下之最而勞亦至矣謂當從容於九德之朝持精養神

以省思慮何尚爾久煩以主計之事耶想鋒車繼自今至耳

四

節下領外計於是三年矣故事當還朝以預論思獻納騎詔未至而位冠九列之命先下搢紳則知俊乂在庭莫可以代之斯民則喜仁人在此抱虛之籍遂除而郡縣不困矣幸甚幸甚敢為牋以具道路之歌伏乞台察

五

某為此彫郡已踰旬朔大懼不稱其任或乏軍興上煩
簿責今幸朝廷有蠲除虛額之令以成節下愛養民力
之意某私自喜幸迂疎可以充位矣不勝朝夕以望條
教之至

嵩山集卷二十九

欽定四庫全書

嵩山集卷三十

宋 昆公遡 撰

東

查運使

即日槐序氣炎伏惟攬轡入境神相循行台候動止萬
福某敬遣一介候諸境上

二

邇日不省台用何如伏惟乘傳而來雖當盛暑玉節所至肅然風清自應不知煩鬱也更祈厚自持養以副巡屬之望

三

伏以風度英秀粹然如圭璧宜薦天地宜在清廟不謂乃爾久使於外雖一方受賜矣其若不稱何佞性靈召之至

四

陝內地褊小無甚劇事殆不足以展大才所謂太阿龍
泉匣而藏之識者所惜也近省制誥改臨益部聖主蓋
亦知之矣此方正議除虛額之調未能即副上意其有
待於節下願言疾驅

五

某本不任為郡如得事忠厚之長以保持之則可耳向
在梁山微節下之賜其何能免於戾耶既來此部猶一
萍之託茫然之水日夕惴恐忽聞輶車當來喜不可言

不覺欣然起舞也某更十告朔亦去矣預恨窮薄又如
往時不得久庇寒士之大廈也

楊安撫

即日天氣淑清伏惟高卧在家安於輿壇台候動止萬
福未間更祈齋養沖粹益究耆艾之祉

二

嘗惜博大之用滯於外服今耄期稱道尤宜膺大政之
咨不應尚居里巷也惟喜此方漸染君子之澤為多耳

幸甚

三

比得見於夔門雖足慰其景慕之懷其如左右在行役
不劇言集重為惆悵矣易守而來喜遂室邇顧衰慵困
於應接未及先以書走廬下遠承勞問感怍不勝道也

四

某之才為之小則可耳今來治此才智之民何以勝其
任公能告以所未聞而佐其所不逮乃區區望於朋舊

也

王安撫

即日星回于天恭惟節下民用遷善化行一道神明所
相台候動止萬福某守地不得登公堂敬以牋代觀

二

比辰不省台用何如歲律推移便見春生始和之氣浹
於上下伏惟沖衿翕受益當粹溫更乞以道養壽前膺
大政之咨不勝至禱

三

為吏盡瘁而在公本其職當然近時此風衰矣至於民
相視而不敢言某嘗竊傷之伏聞按節梓中未久而民
始知有官府可告吏亦惕懼識法令之為可畏也使節
下推此施於天下則所在皆清廉之吏而無寃苦之民
矣某何時見此耶天心仁愛斯人節下必不滯於一方
行且見之

四

某性拙直平時不敢謬為恭敬惟見可敬者則敬之耳
年過五十老眼所閱多矣所敬者獨有節下不惟敬之
而且思盛德每不能忘行念獻歲發春不決日間顧不
得升堂舉一觴以上雅壽私情恨恨不能自己輒敢修
牋以致善頌之意伏望台慈特賜矜覽

五

某竊見節下侍士要自有衡量某何人乃蒙一見遇以
國士相望數百里每以書札問之如待其敵某常用愧

仄何以稱此惟當益修職業以為報爾

王提刑

某敢問弭節之地涉夏何如遙想鶴林牛頭日有爽氣
當此炎月亦復清涼恭惟軺傳對之無復煩鬱扇為清
風被於列城神明所相台候動止萬福某末由趨謁輒
請盡珍重理歸執天下之平

二

某聞之左蜀郡縣循習不振久矣今得玉節臨之幾於

曠然大變其俗由是廣安得去向來大有槩量之害民受賜多矣安得此賜均之天下乎

三

某不敢忘異常之眷有以稱之今已十三告朔幸無過事貽羞門庭然終無大愈人者以副期待念之愧仄

四

某久不上記於侍曹迹若自外乃情則不然也在今世君子宜以為急忽且得罪矣遠蒙高明亮其心曲而不

誅其迹特遣函使賜之名酒嘉肴與臨川文集此豈今世所有哉顧某不足稱此重眷惟有銜感無窮

任運使

即日土潤溽暑恭惟一節以超神相倣裝台候動止萬福某敬奉此牋為聖主得賢之賀

二

比日不省台用何如仁氣所鍾甘雨時霪伏惟齋航未即乘流尚居明臺披衿受涼無復煩暑更祈益薄滋味

以順月令

三

某効職於封內已復三告朔每見所下條教嚴明清簡
郡縣安靜固已自慶遇此比聞欲為茲部考覈抱虛之
調盡下巡屬條流將聞於朝是又為吏以來未嘗見也
忽審騎詔之至始則懼失幃幪繼則喜其將聞於朝者
今則面論斯民果受賜矣幸甚幸甚

四

發興以來于今垂四十年士大夫孰能為國家遠慮以成大功惟是張魏公其志大矣虞仁壽公則遂有歸然之顯効天子蓋謂吾蜀實有其人益思招延盡出其才以終恢復之圖茲宜節下首膺鋒車之召也某敬當傾耳以聽軒天震地之休聲

五

某迂拙無當世之才得一州本為食謀非所堪也然亦不敢不自課厲顧乏趣辨之聲常恐按臨者以此責之

則敗矣不謂初未謁於門牆節下亦未知其為何如人而遽蒙鑒照知其困乏則分以鹽策考其殿逋則寬以歲月若不以常人待之某被此恩紀之厚猶蚊負山不自勝荷今茲雖喜君子之得時遂究大用顧道渴之人不獲喬木之陰能不憫憫伏紙不任增結尚冀牙檣過敝邑併布下悰

汪制置

即日庚辛處躍恭惟高牙在行神明護相台候動止萬

福某敬遣一駒詣節下

二

比來不省台用何如益昌地接秦隴會當早寒計已授
衣遂御功裘更冀無犯風霜保合太和區區以為請

三

節下之治蜀蜀人皆歌舞其賜常願赤鳥之留如韋南
康公坐至中書令位冠廷臣其如霖雨之施局於一方
使天下不被其澤度聖上行當召公矣

四

杖鉞臨此四道蓋三年矣計其勤勞論其見効宜歸授
魁柄乃為稱耳今茲制詔頒下領昭陵之圖書地近職
崇以示光寵蓋不欲奪蜀人之廢麻故也某敢不為蜀
人賀

五

某按刑茲部亦復期年而司存實近蠻徼向來諸公居
此極岌岌今乃得無事飽食者公來雪山重耳幸甚幸

甚

張茶馬

即日白露為霜伏惟持節來臨坰牧神相行邁台候動
止萬福某亟遣音介往承次舍

二

比來台用何如計登輶車之日已是火中暑退復取道
漢中風物清爽行役不為勞也今秋律垂盡更宜預戒
寒事以具冬裘區區之請

三

某老無他好惟喜問賢士大夫一聞其名乃心翹然思見之矣有自三峽外至者無不相稱頌謂即宜歸表著不當此來豈意大用者試之詳故屈逸駕臨此蜀部遂有會期以償夙願幸甚幸甚

四

馬政大事也魯公之頌以駒為首蓋非大賢不能為之施節西來道路誠遠顧聖上所以付屬之意重矣暮年

即見充牘於十二閭遂賜褒詔趣還邇僚也

上查總領

即日露往霜來伏惟坐總賦輿四道蒙惠神明所相台
候動止萬福某奉一牋候諸侍史

二

邇日不審台用何似天地已肅道路無復埃氛按節徐
行當無甚勞况君子體備四時之和豈畏偃薄也其如
養性怡神亦不可忽不勝拳拳之請

三

節下周旋於行都英俊之林久矣今之登廟堂者皆其等夷豈容一時名流尚在外服想皆懷想高標日佇還朝也

四

當今九德之朝正須通儒博洽者居之豈謂兩煩持節以臨輓輸煩劇之地議者皆不滿也殆是未知通儒無適不可耳國朝大用者試之必詳公其自茲翹翔要路

也敢具墨啟為賀他日要獲知言之名

五

某平日企德懷風嘗恨集處不諳今幸同部而又不可
時至弭節之臺固已恨恨自聞畫省當窯益昌相望彌
遠豈勝憫然尚冀音介時來慰勵之寬此馳心

張提刑

即日露淒風息伏惟弭節漢中樂此高寒台候萬福某
奉此候諸節下

二

邇日不省台用何如秦隴之間地寒節爽處之不疾伏
計體府宜之起居多豫更冀時觀夏小正書隨其令而
加節宣為望

三

丞相之門如崑崙鄧林所出皆為世寶左右宜在通顯
久矣始爾驅六轡於外原隰有光識者尤恨其晚耳佇

看璽召

四

去歲益州相值各在行李中雖得暫面區區之懷何曾
得展至今良恨散集驟然自聞出節少府喜不可言會
行部疲羸殊甚還家自力作此記萬不一陳愧仄愧仄



嵩山集卷三十